



In'ovra che va bain cul temp e cul chor

Sut la batgetta da Luzius Hassler preschenta il Chor viril Surses il Requiem da Franz Liszt.

11



Fatg paun per ils cardinals e gardists

Il furner Claudio Stgier ha dastgà lavurar en la cuschina dal Vatican durant il temp dal conclave.

13

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuiria, tel. 081 920 07 10, fax 081 920 07 15

Tschintg propostas per l'avegnir dal turissem

■ (mc) Suentar il na dal pievel a l'olimpiada vul la Partida socialdemocratica lantschar ina discussiun da basa davart l'avegnir dal turissem grischun. En vista al di da partida da sonda proxima ad Arosa ha la suprastanza elavurà in palpircun tschintg project concrets per sviluppar vinavant il turissem grischun era senza olimpiada. Sut il motto «occupaziun stagl vendita» pretenda la ps in masterplan turissem che ha la finamira da cuntanscher letgs chauds sco fundament da la

marca Grischun. Plinavant prentenda la ps dapli investiziuns en la cultura che saja ina eminenta attracziun turistica. Sut il motto «tut va cun skis» postulescha la ps l'introducziun d'ina tariffa d'indigens sin tut las telefericas grischunas e quai en cumbinaziun cun il traffic public. Plinavant vul la ps lantschar ina strategia da qualitat en l'agricultura e promover ina rait integrala da fibras da vaider per l'entir Grischun.

> PAGINA 2

L'amur dil pur

■ (anr/sr) L'emissiun «Bauer, ledig, sucht» digl emetter 3+vegn era a procurar questa stad per cuort'uriala. Quella ga pudessen ils Sursilvans forsia persequitar pir che mai tgei che succeda culs purs e lur eligida. Gest dus loghens d'acziun sesanflan numnadamein en nosa regiun. In dils purs che tscherca la grond'amur ei Fidel Desax da Dardin. El ei dapi 27 onns vieu

e bab da quater affons carschi. Sin siu bein puril a Casu havess el massa plaz per ina dunna. Tgei ch'el spetga da quella e tgei qualitats ch'ella duess haver ha el tradiu all'anr. In auter pur che tscherca l'amur ei Fridolin Caminada da Vrin che vegn presentat proximamein en La Quotidiana.

> PAGINA 3



Fidel Desax da Dardin enquera la dunna per la veta e fa quei en l'emissiun «Bauer, ledig, sucht» da 3+.

FOTO S. ROTHMUND

Per la PEB ün on plütost quiet

■ (anr/bcs) A la prüma radunanza regiunala 2013 es gnü preschantà il quint chi muossa cifras favuravlas. La proposta per financiar progets regiunals es gnüda spostada. Il 2012 es stat per l'Engiadina Bassa ün on plütost quiet sainza müdamaints da personal pro l'administraziun da la Pro Engiadina Bassa (PEB). Il quint 2012 serra cun ün import dad 1,261 milluns francs a charg dals cumüns. Quai vuol dir

100 000 francs damain co'l preventiv. Cumprais aint il quint es il sustegn finanziaal dad 80 000 francs da la PEB pel Tour de Ski in Val Müstair. Üna cunvegna per spigiantar ün conto per progets regiunals es gnüda suspaisa. Quai nu dess pero impedir cha la PEB sustegna progets regiunals chi ston gnir sancziunats dals singuls cumüns.

> PAGINA 9

Adegna segl manovel digl papa

■ (anr/gns) Bler da far ò gia igls davos diesch deis William Kloter, igl major dalla guardia papala tgi segna tranter oter er per la siertad digl papa. Igl Surmiran discorra dad en mument emozional cura tgi el vegia pudia accompagnar per l'amprema geda papa Francestg. Anc pi impressiun vegia fatg cura tgi el vegia pudia gratular persunalmaintg agl nov papa. El seia en om fitg simpel, simpatic e William Kloter è er persvadia tgi papa Francestg davainta en «grond» papa.

> PAGINA 13

Viver illa regiun alpina

■ (anr/rd) Davo la radunanza regiunala da la Pro Engiadina Bassa da mardi davomezdi a Brail ha la Cipra muossa ün cuort film. Il film sun gnüts preschantats cumüns chi han trat a nüz differentas pussibilitats per mantgnair ils spazis da viver da bes-chas e plantas: In Val Müstair es gnü renaturalisà il let dal flüm Rom ed a Ramosch han scolars da Vienna puli prada e rövens per dar a bes-chas e plantas ün spazi da viver adattà.

> PAGINA 9

Da gronda impurtonza

Entschatta dalla stagiun da baghegiar el Grischun cun bunas reservas da lavur

DA HANS HUONDER / ANR

■ In'analisa dall'Uniu dils impressaris dil Grischun muossa che la construcziun bassa ei d'eminenta impurtonza per l'economia publica. Ils davos onns ha quei sector contonschiu rodund la mesadad digl entir volumen dalla branscha da baghegiar principala. Tenor l'uniun han las investiziuns ella construcziun bassa el cantun Grischun contonschiu ils davos onns mintgamai rodund ina mesa milliarda francs. Igl onn vargau ein ellas sereducidas per 11,9 pertschien sin biebein 440 milliuns francs. In dils motivs per quella sminuaziun ei la schliat'aura digl emprem semester stada. Persuenter ein las reservas per quest onn bunas. Sco quei che l'Uniu dils impressaris dil Grischun constatescha ei il punct culminont dil sector dalla construcziun principala vegniu contonschiu igl onn 2011. Il volumen total d'incaricas el Grischun ha contonschiu gliez onn la summa da pressapauc ina milliarda francs. Igl onn vargau ei vegniu registrau el Grischun in volumen d'incaricas



Pervia dallas malsegirtads pertuccont la branscha turistica e la construcziun da secundas habitaziuns han bias fatschentas dalla construcziun da baghegiar principala reduciu il diember da collaboraturs.

KEYSTONE

da rodund 940 milliuns francs. La fin finala eis ei vegniu baghegiu per 903,2 milliuns francs. Tenor Andreas Felix, meinafatschenta

dall'uniun, eis ei grev da giudicar co il stop da baghegiar secundas habitaziuns vegn a s'effectuar. Pusseivla ei ina sperdita da lavur d'en-

tochen 100 milliuns francs el Grischun.

> PAGINA 3

72 000 km entuorn il mund

Viadi d'aventura da Margrit e Pius Jörger da Val

■ (anr/gv) Tgi siemia buca mintgatun d'ina tura cun velo entuorn il mund? Quei siemi han Margrit e Pius Jörger da Val realisau. Ils davos tschun onns han els absolviu 72 000 kilometers sil velo ed han traversau tiaras e continents. Las aventuras, las impressiuns e las emozions ensemen cullas fotografias havessen

strusch plaz en in cudisch. La dumengia vargada han ils dus globetrotters raquintau a Glion dil via-di. En duas uras han els saviu raquintar mo d'ina pintga part e gia quei ei stau impressiunont. Il però da Val ch'ei gest ius en pensiu ha gudiu las cuntradas e marcaus, ha gudiu ils vitgs ed oravontut la glieud. Dallas tiaras che nus legin

mo dil schliet ha Margrit Jörger raquintau mo dil bien ed oravontut mo dil bien da lur habitonts. Sco il però da Val han paucs auters viu il mund, schi bia e schi datier. Pregiudezis enconuschan ils dus globetrotters buc, il viadi ha slargau il horizont.

> PAGINA 7



Cul velo entuorn il mund. Quei siemi han Margrit e Pius Jörger da Val realisau ils davos tschun onns.

MAD



Servetsch d'abunents e da distribuziun: tel. 0844 226 226 mail: abo@suedostschweiz.ch